



Ni Pangulong Thomas S. Monson

Tapana ang Banas sang Imo mga Tiil

Kon kita nagatulok kay Jesucristo bilang aton Halimbawa kag samtang naga sunod kita sa Iya mga tikang, sarang kita makabalik sing hilway sa aton Langitnon nga Amay.

Mga pinalangga kong kauturan, mapainubuson ako nga nagatindog sa inyo atubang sini nga aga. Nagapangabay ako sang inyo pagtuo kag mga pangamuyo para sa akon samtang ginapaambit ko sa inyo ang akon mensahe.

Tanan kita nag-umpisa sang isa ka matahum kag kinahanglanon nga pagpanglakaton sang ginbayaan naton ang kalibutan sang mga espiritu kag nagsulod sa sining masami-nga-makahalangkat nga kahimtangan nga ginatawag mortalidad. Ang mayor nga mga katuyuan sang aton pagkatawo sa kalibutan amo ang mag-angkon sang lawas sang unod kag tul-an, makabaton sang eksperiensya nga nagagikan lamang sa paghamulag gikan sa aton langitnon nga mga ginikanan, kag agud tan-awon kon pagasundon naton ang mga kasuguan. Sa libro ni Abraham kapitulo 3 mabasa hanon: "Kag pagatilawan naton sila, agud makita kon himuon nila ang tanan nga butang nga isugo sang ila Ginuong Dios sa ila."¹

Sang magkari kita sa duta, dala naton ang isa ka dako nga regalo gikan sa Dios—ang aton kahilwayan sa pagpili. Sa linibo ka paagi may pribelihiyo kita sa pagpili para sa aton kaugalingon. Diri sarang kita magtuon gikan sa mabudlay nga agalon sang eksperiensya. Ginahibalo naton ang maayo kag malain. Ginakilala naton kon diin ang mapait kag ang matam-is. Natun-an naton nga ang mga desisyon nagadikta sang kapalaran.

Napat-od ko nga nagbiya kita sa aton Amay nga may nagapalanglaw ng handom nga magbalik sa Iya, agud mabaton naton ang pangkahitaasan nga ginplano Niya para sa aton nga amo man ang gusto naton para sa aton kaugalingon. Bisan pa nga kita dapat ang magpangita kag magsunod sinang banas nga magadala sa aton pabalik sa aton Amay sa Langit, wala Niya kita ginpadala diri nga wala sing direksyon kag giya. Kundi, ginhatagan Niya kita sang kاسانگکانان nga kinahanglanon naton,

kag buligan Niya kita kon pangayoon naton ang Iya bulig kag tinguaan nga himuon ang tanan naton nga masarangan sa pagpadayon tubtob sa katapusan kag mag-agom sang kabuhi nga wala'y katapusan.

Agud magiyahan kita may yara kita sang mga pulong sang Dios kag sang Iya Anak nga makita sa aton balaan nga mga kasulatan. May yara kita sang mga laygay kag pinanudlo sang mga propeta sang Dios. Kag pinakaimportante, ginpahamtangan kita sang perpektu nga halimbawa agud sundon—ang halimbawa sang aton Ginuo kag Manluluwas, si Jesucristo—kag gintulinan kita nga sundon ina nga halimbawa. Ang Manluluwas mismo nagsiling: "Kari, magsunod sa akon."² "Ang mga buluhaton nga inyo nakita nga ginahimo ko, ina amo man ang inyo himuon."³ Ginsambit Niya ining pamangkot, "Ano nga sari sang mga tawo kamo mangin dapat?" Kag dayon Sia nag-sabat, "Sa pagkamatuod ginasiling ko sa inyo, bisan subong man sa akon."⁴ "Ginmarkahan niya ang banas kag nag-una sa alagyan."⁵

Kon kita nagatulok kay Jesucristo bilang aton Halimbawa kag samtang naga sunod kita sa Iya mga tikang, makabalik kita nga hilway sa aton Langitnon nga Amay agud magpuyo upod sa Iya sa katubtuban. Siling sang propeta nga si Nefi, "Luwas kon ang isa ka tawo magapadayon tubtob sa katapusan, sa pagsunod sang halimbawa sang Anak sang buhi nga Dios, indi sia maluwas."⁶

Isa ka babayi, tagsa ka tion nga magsugid parte sa iya mga eksperiensya sang magbisita sa Balaan nga

Duta, nagasiling, "Naglakat ako sa ginlaktan ni Jesus!"

Nagkadro sia sa duog kon sa diin nagpangabuhi kag nagpanudlo si Jesus. Siguro nagtindog sia sa bato nga gintindungan ni Jesus ukon nagtulok sa kabukiran nga gintulok Niya sadto. Ining mga eksperiensya, bisan ini lamang, nangin makakulunyag na para sa iya; apang ang pisikal nga maglakat *kon sa diin* naglakat si Jesus indi masyado kaimportante sangsa maglakat *kasubong* nga Sia naglakat. Ang pag-ilog ang Iya mga binuhatan kag pagsunod sang Iya halimbawa mas importante sangsa pagsubay sang nabilin sa mga banas nga Iya ginlaktan sa kabuhi.

Sang gintanyag ni Jesus ang pangagda sa isa ka manggaranon nga tawo, "Kari, magsunod sa akon,"⁷ wala Sia magtumod nga sundon Sia sang manggaranon nga tawo pasaka-panaog sa mga bungyod kag mga nalupyakan sa ila lugar.

Indi naton kinahanglan maglakat sa mga baybayon sang Galilea ukon sa mga kabukiran sang Judea kon sa diin naglakat si Jesus. Tanan kita sarang maglakat sa banas nga Iya ginlaktan kon, upod ang Iya mga pulong sa aton mga dulungan, ang Iya Espiritu nga nagapuno sa aton mga tagipusuon, kag ang Iya mga pinanudlo nga nagagiya sa aton pangabuhi, pilion naton nga sundon Sia samtang nagapanglakaton kita sa kabuhi. Ang Iya halimbawa nagpasanag sa alagyan. Siling Niya, "Ako amo ang dalan, kag ang kamatuoran, kag ang kabuhi."⁸

Kon aton tun-an ang banas nga ginlaktan ni Jesus, makita naton nga gin-agyan man Niya ang madamo sa amo man nga mga hangkat nga pagatubangon naton sa kabuhi.

Halimbawa, ginlakat ni Jesus ang banas sang kapaslawan. Bisan pa nga nag-eksperiensya Sia sang madamo nga mga kapaslawan, ang isa sa pinakamakatalandog makita sa Iya pagtangis para sa Jerusalem sang Iya gintakop ang Iya pag-alagad sa publiko. Ang mga anak sang Israel

nagsikway sang proteksyon nga Iya gintanyag sa ila. Samtang nagatulok Sia sa siyudad nga malapit na itugyan sa kalaglagan, napun-an Sia sing mga balatyagon sang tuman nga kasubo. Sa kalisod nagtuaw Sia, "O Jerusalem, Jerusalem, nga nagapatay sang mga manalagna kag nagabato sang mga ginpadala sa imo! Makapila kuntani nga buot ko tipunon ang imo mga anak subong sang munga nga nagatipon sang iya mga piso sa idalom sang iya mga pakpak, kag indi ka buot!"⁹

Ginlakat ni Jesus ang banas sang pagsulay. Si Lucifer, inang yawa, nga nagtipon sang iya pinakadako nga kusog, sang iya pinakamakagalanyat nga pagpang-ilad, nagtentar sa Iya nga nagpuusa sing 40 ka adlaw kag 40 ka gab-i. Wala mag-ampo si Jesus; kundi, ginpakigbatuan Niya ang tagsa ka pagsulay. Ang iya hingapusang mga pulong: "Palayo ka, Satanas!"¹⁰

Ginlakat ni Jesus ang banas sang kasakit. Panumduma ang Getsemani, kon sa diin yara Sia "sa kasakit . . . kag ang iya balhas nanginkaangay sang dalagkong tinulo sang dugo nga nagatupa sa duta."¹¹ Kag wala gid sing malipat sang Iya pag-antos sa mapintas nga krus.

Ang tagsa sa aton magalakat sa banas sang kapaslawan, ayhan tungod sa isa ka nadula nga oportunidad, isa ka gahum nga wala gingamit sing husto, mga pagpili sang isa ka pinalangga, ukon sang mga pagpili nga aton mismo ginahimo. Ang banas sang pagsulay mangin banas man sang kada isa. Mabasahan naton sa ika-29 nga seksyon sang Doctrine and Covenants: "Kag kinahanglan gid nga ang yawa magsulay sang mga anak sang tawo, kay kon indi indi sila mangin mga manugdumala sang ila mga kaugalingon."¹²

Kita man magalakat sa banas sang kasakit. Kita, bilang mga alagad, makaapaobot sing indi magsobra sangsa Agalon, nga nagbiya sa kalibutan matapos lamang ang grabe nga kasakit kag pag-antos.

Samtang makasalapo kita sa aton banas sang mapait nga kasubo,

makasalapo man kita sang dako nga kalipayan.

Kita, kaupod si Jesus, sarang maglakat sa banas sang pagkamatinumanon. Indi ini pirme mangin mahapos, pero himuong naton nga gabay nga mga pulong ang ginpanpanubli sa aton ni Samuel: "Yari karon, ang pagtuman maayo pa sang sa halad, kag ang pagpamatid sang sa sapay sang mga carnero."¹³ Panumdumon naton nga ang resulta sang pagka-dimatinumanon amo ang pagkabihag kag kamatayon, samtang ang padya para sa pagkamatinumanon amo ang kahilwayan kag wala'y katapusang kabuhi.

Kita, pareho kay Jesus, sarang maglakat sa banas sang pag-alagad. Kasubong sang isa ka masanag nga suga sang kaayo amo ang kabuhi ni Jesus sang Sia nag-alagad sa tunga sang katawhan. Naghatag Sia sing kusog sa mga til sang lupog, panulok sa mga mata sang bulag, palamatian-an sa mga dulungan sang bungol.

Si Jesus naglakat sa banas sang pangamuyo. Gintudloan Niya kita kon paano magpangamuyo paagi sa paghatag sang matahum nga pangamuyo nga ginakilala naton bilang ang Pangamuyo sang Ginuo. Kag sin-o bala ang malipat sa Iya pangamuyo sa Getsemani, "Indi ang akon kabubut-on, kundi ang imo, paghimoon"?¹⁴

Iban pa nga mga panulin nga ginhatag sa aton sang Manluluwas yara lamang sa punta sang aton mga tudlo, makita sa balaan nga mga kasulatan. Sa Iya Wali sa Bukid, ginasilingan Niya kita nga mangin maluluy-on, mangin mapainubuson, mangin matarong, mangin putli sa tagipusuon, mangin mga makigdaeton. Ginatulinan Niya kita nga tindugan sing maisog ang aton mga ginatuohan, bisan pa nga ginainsulto kag ginpigos kita. Ginapangabay Niya kita nga pasigahon ang aton mga kasanag agud makita sang iban kag makaangkon sing kaluyag nga himayaon ang aton Amay sa Langit. Ginatudloan Niya kita nga mangin matinlo sa

aton panghunahuna kag sa aton mga binuhutan. Ginasilingan Niya kita nga labing importante ang magtipon sang mga manggad sa langit sang sa duta.¹⁵

Ang Iya mga paanggid nagatudlo nga may gahum kag awtoridad. Sa istorya sang maayo nga Samariahanon, ginatudloan Niya kita nga magpalangga kag mag-alagad sa aton mga kasilingan.¹⁶ Sa Iya paanggid nahanungod sa mga talanton, ginatudloan Niya kita nga pauswagon ang aton mga kaugalingon kag labuton ang kahimpitan.¹⁷ Sa paanggid nahanungod sa nadula nga carnero, ginatulinan Niya kita nga salbaron yadtong mga nagbiya sa banas kag nagtalalang.¹⁸

Samtang ginatinguhaan naton nga ibutang si Cristo sa sentro sang aton mga kabuhi paagi sa pagtuon sang Iya mga pulong, paagi sa pagsunod sang Iya mga pinanudlo, kag paagi sa paglakat sa Iya banas, ginpangako Niya nga ipaambit sa aton ang wala'y katapusan nga kabuhi nga iya gin-panginmatyan nga maangkon. Wala na sing mas mataas pa nga katuyuan sangsa sini, nga dapat naton pilion nga batunon ang Iya disciplina kag mangin Iya mga disipulo kag himuong ang Iya buluhaton sa bug-os naton nga kinabuhi. Wala na sing iban pa, wala na sing bisan ano nga pagpili, ang makahimo sa aton pareho sang iya masarangan.

Sa akon pagpanumdom sadtong mga tunay nga nagtinguha nga sundon ang halimbawa sang Manluwas kag sang mga naglakat sa Iya

banas, nagasulod gilayon sa akon pamensaron ang mga ngalan nanday Gustav kag Margarete Wacker—duha sa pinaka-Cristohanon nga mga tawo nga akon nakilala. Sila tumandok nga mga Aleman nga nagsalhin sa nasidlangan nga Canada, kag nakilala ko sila samtang nagaalagad ako didto bilang mission president. Si Brother Wacker nagatrabaho bilang isa ka barbero. Bisan pa nga ang ila kita limitado, ginpaambit nila ang tanan nga yara sa ila. Wala sila ginbugayan sing mga kabataan, pero gin-atipan nila ang tanan nga nagasulod sa ila puluy-an. Ang maalam kag sopistikado nga mga lalaki kag babayi nagapakigkita gid sa sining mapainibuson, wala sing tinapanusang mga alagad sang Dios kag nagkabig sang ila mga kaugalingon nga maswerte kon makahinguyang sing isa ka oras upod sa ila.

Ordinaryo lamang ang ila pang-hitsurahon, ang ila Iningles naga-utol-utol kag daw mabudlay intiendihon, ang ila puluy-an simple kaayo. Wala sila sing salakyan ukon telebisyon, ukon nagahimo sang bisan ano nga butang nga masami ginatalupangod sang kalibutan. Apang ang mga matinuohon nagasubay sang banas padulong sa ila puluy-an agud mag-ambit sang pamatyagon nga yara didto. Ang ila puluy-an isa ka langit diri sa duta, kag ang espiritu nga ila ginapaambit isa nga may puraw nga paghidaet kag kaayo.

Kita man sarang makaangkon sinang espiritu kag magpaambit sini

sa kalibutan samtang nagalakat kita sa banas sang aton Manluluwas kag nagsunod sang Iya perpekto nga halimbawa.

Mabasa naton sa Mga Hulubaton ang paandam, “Tapana ang banas sang imo mga tiil.”¹⁹ Kon himuong naton ini, maangkon naton ang pagtuo, bisan pa ang kaluyag, nga maglakat sa banas nga ginlaktan ni Jesus. Indi kita magaduhaduha nga yara kita sa banas nga gusto sang aton Amay nga aton sundon. Ang halimbawa sang Manluluwas nagapahamtang sang baylayan sang tanan nga aton ginahimo, kag ang Iya mga pulong nagahatag sang wala nagapalya nga giya. Ang Iya banas magadala sa aton pauli nga hilway sa katalagman. Kabay nga ini mangin aton bugay, ginapangamuyo ko sa ngalan ni Jesucristo, nga akon ginapalangga, nga akon ginaalagaran, kag akon ginapanaksihon, amen.

MGA TANDA

1. Tan-awa sa Abraham 3:25.
2. Lucas 18:22.
3. 3 Nefi 27:21.
4. 3 Nefi 27:27.
5. Eliza R. Snow, “How Great the Wisdom and the Love,” *Hymns*, no. 195.
6. 2 Nefi 31:16.
7. Lucas 18:22.
8. Juan 14:6.
9. Lucas 13:34.
10. Mateo 4:10.
11. Lucas 22:44.
12. Tan-awa sa Doctrine and Covenants 29:39.
13. 1 Samuel 15:22.
14. Lucas 22:42.
15. Tan-awa sa Mateo 5:6.
16. Tan-awa sa Lucas 10:30–37.
17. Tan-awa sa Mateo 25:14–30.
18. Tan-awa sa Lucas 15:4–7.
19. Mga Hulubaton 4:26.

Mga Pinanudlo para sa Aton Panahon

Halin sa Oktobre 2014 tubtob Abril 2015 ang mga leksyon sa Melchizedek Priesthood kag sa Relief Society sa ikap-at nga mga Domingo dapat maghalin sa isa ukon mas madamo pa nga mga pamulong-pulong nga ginhataq sa pang-kabilugan nga komperensya sang Oktubre 2014. Sa Abril 2015, ang mga pamulong-pulong mahimo nga kuhaon gikan sa Oktubre 2014 ukon sa Abril 2015 nga pang-kabilugan nga komperensya. Ang mga stake kag district president dapat magpili kon ano nga mga pamulong-pulong ang paggamiton sa ila mga lugar, ukon mahimo nila itulin ini nga responsibilidad sa mga bishop kag branch president.

Ang mga pamulong-pulong sarang mabasa sa madamo nga mga lenguahe sa conference.lds.org.



Ni Pangulong Dieter F. Uchtdorf

Ika-duhang Manuglaygay sa Unang Panguluhan

Ang Pagbaton sang Panaksihon sang Kasanag kag Kamatuoran

Ang inyo personal nga panaksihon sang kasanag kag kamatuoran indi lamang magabugay sa inyo kag sa inyo kaliwatan diri sa kalibutan, kundi magaupod ini sa inyo sa bug-os nga wala'y katapusan.

Bilang isa ka piloto, nakabiyahen na ako sing madamo nga inoras patabok sa mga kontinente kag kadagatan sa tion sang kadulom sang kagab-ihon. Ang pagtan-aw sang langit sa gab-i sa gwa sang akon bintana sa eroplano, labi na gid ang Milky Way, masami nga nagapaha-lawhaw sa akon sang kalaparon kag kadalumon sang mga gintuga sang Dios—nga ginalaragway sang balaan nga mga kasulatan nga “mga kalibutan nga indi maisip.”¹

Wala pa mag-isa ka siglo ang nagligad sang ang kalabanan sang mga astronomer ang naghaum-haom nga ang aton galaxy nga Milky Way amo lamang ang nagaisahanon nga galaxy sa bug-os nga uniberso.²

Nagdumdom sila nga ang tanan sa gwa sang aton galaxy isa lamang ka malapad nga kawalan, isa ka wala'y katapusan nga espasyo—bakante, matugnaw, kag wala sing mga bituon, kasanag, kag kabuhi.

Sang nangin mas sopistikado na ang mga teleskopyo—lakip na ang mga teleskopyo nga sarang ipadala sa kahawaan—ang mga astronomers nagsugod sa paghangop sang isa ka matahum, halos mabudlay intiendihon nga kamatuoran: ang uniberso mas dako gali kaayo sangsa ginapatihan sang bisan sin-o sadto, kag nga ang kalangitan napun-an sang indi maisip nga mga galaxy, ang tagsa nagaunod sang ginatos ka binilyon ka mga bituon.³

Sa malip-ot lamang nga tion, ang aton paghangop parte sa uniberso himpit nga nagbaylo.

Sa karon sarang naton makita ang pila sining malayo nga mga galaxy.⁴

Nakahibalo kita nga yara sila dira. Yara na sila dira sa sulod sang malawig na kaayo nga panahon.

Apang antes makaangkon ang katawhan sang mga instrumento nga may igo nga kabaskog agud tipunon ang selestial nga kasanag para makita ining mga galaxy, wala kita magpati nga posible gali ini.

Ang kalaparon sang uniberso wala gulpi magliwat, pero ang aton ikasrang nga makakita kag makahangop sining kamatuoran nagbaylo gid sing dako. Kag kaupod inang mas dako nga kasanag, ang katawhan nagsugod nga makakita sang matahum kaayo nga mga talan-awon nga wala gid sadto ginahunahuna.

Mabudlay para sa Aton nga Magpati Sinang Indi Naton Makita

Ibutang ta nga nakabiyahen kamo pabalik sa kahapon kag nakigsugilan sa mga tawo nga nagkaruhiisa ka libo ukon isa ka gatos ka tuig ang nagligad. Hunahunaa ang pagtinguhua nga ilaragway sa ila ang pila ka moderno nga mga teknolohiya nga ginapasipakpakan naton sa karon nga panahon. Halimbawa, ano ayahan ang pamensaron sining mga tawo parte sa aton kon sugiran naton sila parte sa mga jumbo jets, microwave ovens, mga ginauyatan nga gamit nga nagunod sang madamo kaayo nga digital nga mga library, kag mga video sang aton mga apo nga ginapaambit naton gilayon sa minilyon ka mga tawo sa bug-os nga kalibutan?

Basi may pila man nga magpati sa aton. Ang kalabanan magayaguta, magapamatok, ukon basi gani magpahipos ukon maghalit sa aton. Ang pila mahimo nga magtinguha sa paggamit sa logika, pagpangatarungan, kag mga ebidensya nga nahibal-an nila agud ipakita nga naintoan kita, buang-buang, ukon basi gani makatalagam. Mahimo nga akusaron nila kita sa pagtinguha sa pagpatalang sa iban.

Pero siyempre, nagsala gid lamang ini sila. Mahimo nga maayo man ang ila tinutuyo kag sinsero. Mahimo nga positibo man ang ila pamatyagan sang ila opinyon. Apang indi lang gid sila makakita sing maathag tungod wala pa nila mabaton ang mas kompleto nga kasanag sang kamatuoran.

Ang Pangako sang Kasanag

Daw isa ka kinaiya sang katawan ang maglaum nga husto kita bisan sala kita. Kag kon amo sina ang sitwasyon, ano nga paglaum ang may yara para sa bisan sin-o sa aton? Kapalaran bala naton nga magpaanud-anod sa tunga sang dagat sang nagasumpakilay nga impormasyon, nga nahunong sa balsa nga gin-angot-angot naton gikan sa aton mga opinyon?

Impossible bala nga makita ang kamatuoran?

Ang katuyuan sang akon ginahambal amo ang ipahibalo ang masadya nga mensahe nga ang Dios Mismo—ang Ginuo sang mga Kasuldedohan nga nakahibalo sang tanan nga kamatuoran—naghatac sa Iya mga anak sang pangako nga sarang nila hibal-on ang kamatuoran para sa ila kaugalingon.

Palihog binagbinaga ang kasang-karon sang sini nga saad;

Ang Nagapadayon kag Gamhanan nga Dios, ang Tagtuga sining indi matungkad nga uniberso, magahambal sa ila nga nagpalapit sa Iya nga may sinsero nga tagipusuon kag tunay nga katuyuan.

Magahambal Sia sa ila sa mga damgo, mga palanan-awon, mga hunahuna, kag mga balatyagon.

Magahambal Sia sa paagi nga indi gid masal-an kag masobra pa sangsa tawhanon nga eksperiensiya. Hataagan Niya sila sang diosnon nga giya kag mga sabat para sa ila personal nga mga kabuhi.

Siyempre, may yara gid sinang magayaguta kag maghambal nga ining butang imposible, nga kon may Dios gid man, mas madamo pa Sia nga mas maayo himuong sangsa magpamati kag magsabat sa pangamuyo sang isa ka tawo.

Pero ginasiling ko ini sa inyo: nagaulikid ang Dios sa inyo. Magapamati Sia, kag magasabat Sia sa inyo personal nga mga pamangkot. Ang mga sabat sa inyo mga pangamuyo magaabot sa Iya kaugalingon nga paagi kag sa Iya kaugalingon nga tion, kag gani, kinahanglan ninyo nga pamatiang ang Iya tingug. Gusto sang Dios nga makita ninyo ang alagyan pabalik sa Iya, kag ang Manluluwas amo ang alagyan.⁵ Luyag sang Dios nga magtuon kamo parte sa Iya Anak, nga si Jesucristo, kag angkunon ang dako nga paghidaet kag kalipay nga nagaabot gikan sa pagsunod sang banas sang diosnon nga pagkedisipulo.

Mahal kong mga abyan, yari ang isa ka direkta nga eksperimento, nga may garantiya gikan sa Dios, nga makita sa libro sang dumaan nga kasulatan nga gintanyag sa tagsa ka lalaki, babayi, kag bata nga handa nga magtilaw sini:

Una, kinahanglan ninyo nga tun-an ang pulong sang Dios. Buot silingon sina amo ang pagbasa sang balaan nga mga kasulatan kag pagtuon sang mga pulong sang dumaan subong man sang moderno nga mga propeta parte sa ginpanumbalik nga ebanghelyo ni Jesucristo—indi sa tuyo nga dudahan ukon pakalainon kundi nga may sinsero nga kaluyag nga diskubrekon ang kamatuoran. Binagbinaga ang mga butang ng inyo mabatyagan, kag ihanda ang inyo mga hunahuna nga batunon ang kamatuoran.⁶ “Bisan pa kon indi na kamo maglabaw sangsa maghandum sa pagpati . . . nga mahatagan ninyo sing duog ang [pulong sang Dios].”⁷

Ika-duha, kinahanglan ninyo nga pamensaron, binagbinagon, tinguaan sing maisog nga magtuo,⁸ kag mangin mapinasalamaton sa kamaluluy-on sang Ginuo sa Iya mga anak gikan sa tiyempo ni Adan tubtob sa aton panahon agud mag-pahamtang sang mga propeta, mga manugtulok, kag mga manugbugna nga magpanguna sa Iya Simbahan kag buligan kita sa pagbalik sa Iya..

Ikatlo, kinahanglan ninyo mangangot sa Amay nga Langitnon, sa ngalan ni Jesucristo, agud ipakita sa inyo ang kamatuoran sang Ang Simbahan ni Jesucristo sang mga Santos sa Ulihing mga Adlaw. Magpamangkot nga may bunayag nga tagipusuon kag matuod-tuod nga tinutuyo, nga may pagtuo kay Cristo.⁹

May yara man sang *ikaapat* nga tikang, nga ginhatac sa aton sang Manluluwas: “Kon bisan sin-on tawo buot maghimo sang kabubut-on [sang Dios], makahibalo sia kon ang pagtulun-an gikan sa Dios ukon nagpamulong ako sa akon kaugalingon.”¹⁰ Buot silingon, kon luyag ninyo nga pamatud-an ang kamatuoran sang mga prinsipyo sang ebanghelyo, kinahanglan gid anay nga ipangabuhi ninyo ini. Tilawi ang mga doktrina sang ebanghelyo kag mga pinanudlo sa Simbahan sa inyo mismo nga kabuhi. Himoa ini nga may matuod-tuod nga tinutuyo kag nagapadayon nga pagtuo sa Dios.

Kon himuong ninyo ining mga butang, may pangako kamo gikan sa Dios—nga nagatindog sa Iya pulong¹¹—nga ipakita Niya sa inyo ang kamatuoran paagi sa gahum sang Balaan nga Espiritu.. Hatagan Niya kamo sang mas dako nga kasanag nga magatugot sa inyo nga makakita sa kadulom kag magsaksi sang mahimayaon kaayo nga mga talan-awon nga indi makita sang tawhanon nga panulok.

May pila nga mahimo magsiling nga ining mga tikang mabudlay kaayo ukon indi takos sa kabudlay. Apang ginapanugyan ko nga ining personal nga panaksihon sang

ebanghelyo kag sang Simbahan amo ang pinakaimportante nga butang nga maagom ninyo sa sini nga kabuhi. Indi lamang kamo sini bugayan kag giyahan sa sining kinabuhi, kundi may direkta man ini nga importansya sa inyo kabuhi sa bug-os nga katubtuban.

Ang mga Butang sang Espiritu Sarang Lamang Mahangpan paagi sa Espiritu

Ang mga siyentipiko nabudlayan nga intiendihon ang kasangkaron sang uniberso tubtob nangin binag-o ang mga instrumento nga makatipon sang mas dako-dako nga kasanag agud mahangpan ang mas kompleto nga kamatuoran.

Si Apostoles Pablo nagtudlo sang kapareho nga prinsipyo nahanungod sa espirituhanon nga ihibalo. "Ang tawong di-espirituhanon wala nagabaton sang mga hiyas sang Espiritu sang Dios," ginsulat niya sa mga taga-Corinto, "kay kabuangan sila sa iya, kag indi sia makahangop sa ila bangud nga ginatalupangod sila sa espirituhanon nga bagay."¹²

Ang buot silingon, kon gusto ninyo nga makilala ang espirituhanon nga kamatuoran, dapat ninyo gamiton ang husto nga mga instrumento. Indi ninyo mahangpan ang espirituhanon nga kamatuoran gamit ang mga instrumento nga indi makakilala sini.

Ang Manluluwas naghambal sa aton sa aton nga panahon, "Ang butang nga iya sang Dios masanag; kag ang nagabaton sang kasanag, kag nagapadayon sa Dios, nagabaton sing dugang nga kasanag; kag inang kasanag nagadako nga nagadako tubtob sa himpit nga adlaw."¹³

Kon mas ginapauyon naton ang aton mga tagipusuon kag mga kaisipan pakadto sa Dios, mas nagalikop ang diosnon nga kasanag sa aton mga kalag. Kag sa tagsa ka tion nga halog sa buot kag hanuot kita nga napangita sinang kasanag, ginapakita naton sa Dios ang aton kahanda sa pagbaton sang mas dako nga kasanag. Sing amat-amat, ang mga butang nga sadto daw buron, madulom, kag

malayo mangin matin-aw, masanag, kag pamilyar sa aton.

Sa amo man, kon ilayo naton ang aton mga kaugalingon sa kasanag sang ebanghelyo, ang aton mismo nga kasanag magsugod sa pagdulom—indi sa sulod sang isa ka adlaw ukon isa ka semana pero amat-amat sa kadugayan—tubtob nga magbalikid kita kag indi na naton mahangpan kon ngaa nagpati kita sadto nga matuod ang ebanghelyo. Ang aton ihibalo sang una mahimo nga daw binuang na para sa aton tungod ang tuman kaathag sadto mangin buron, buaw, kag malayo na sa liwat.

Amo ini kon ngaa ginainsister gid ni Pablo nga ang mensahe sang ebanghelyo kabuangan para sa ila nga nagakawala, "apang sa [ila nga] ginaluwas ini gahum sang Dios."¹⁴

Wala sing Pagtilaw sang Kapuraw

Ang Simbahan ni Jesucristo sang mga Santos sa Ulihing mga Adlaw isa ka lugar para sa mga tawo nga may nagkalain-lain nga mga panaksihon. May pila ka mga miyembro sang Simbahan nga ang panaksihon pat-od kag nadabdab sing masingkal sa sulod nila. Ang iban nagatinguha pa nga hibaluan sa ila kaugalingon. Ang Simbahan isa ka puluy-an para sa tanan agud tipunan, bisan ano pa man ang kadalumon ukon kataason sang aton panaksihon. Wala gid ako sing nahibal-an nga paskil sa mga puertahan sang aton mga simbahan nga nagasiling, "Kinahanglan nga amo sini kataas ang imo panaksihon para makasulod."

Ang Simbahan indi lamang para sa perpekto nga mga tawo, kundi para ini sa tanan nga "magkari kay Cristo, kag magmangin himpit sa iya."¹⁵ Ang Simbahan para sa mga tawo nga pareho ninyo kag nakon. Ang Simbahan isa ka duog sang pag-abibi kag pagbatiti, indi sang pagseparar ukon pagpanaway. Isa ini ka lugar kon sa diin nagadab-ot kita agud magpaisog, magbayaw, kag magtib-ong sa kada isa samtang ginahimo naton ang aton

indibidwal nga pagpangita sang diosnon nga kamatuoran.

Kon pamensaron gid, kita tanan mga biyahero nga nagapangita sang kasanag sang Dios samtang naga-panglakaton sa banas sang pagkedisipulo. Wala naton ginahusgaran ang iban sa kadakuon sang kasanag nga mahimo ukon indi nila mahatag; kundi, ginasagod kag ginapadasig ang tanan nga kasanag tubtob magdako ini nga maathag, masanag, kag matuod.

Isa ka Saad para sa Tanan

Kilalahon naton nga sa masami ang pag-angkon sang panaksihon indi makuha sa isa ka minuto, isa ka oras, ukon isa ka adlaw. Indi lang sing makaisa kag tapos na dayon. Ang proseso nga pagtipon sang espirituhanon nga kasanag isa ka lalabuton nga bug-os-kabuhi.

Ang inyo panaksihon parte sa buhi nga Anak sang Dios kag sa ginpanumbalik nga Simbahan, Ang Simbahan ni Jesucristo sang mga Santos sa Ulihing mga Adlaw, mahimo nga indi dayon mag-abot suno sa gusto ninyo, pero ginapangako ko ini sa inyo: kon himuong ninyo ang inyo babin, magaabot ini,

Kag mangin mahimayaon ini.

Ginatanyag ko ang akon personal nga pamatuod nga ang espirituhanon nga kamatuoran magapuno sang inyo tagipusuon kag magadala sang kasanag sa inyo espiritu. Ipakita sini sa inyo ang puraw nga kaalam upod ang manami nga kalipay kag langitnon nga paghidaet. Naeksperiyensahan ko na ini sa akon kaugalingon paagi sa gahum sang Balaan nga Espiritu.

Kasubong sa ginsaad sa dumaan nga balaan nga kasulatan, ang indi malaragway nga presensya sang Espiritu sang Dios magatuga sa inyo nga magkanta sang ambahanon sang nagatubos nga gugma,¹⁶ magbayaw sang inyo mga mata sa langit, kag magsinggit sa pagdayaw sa Labing Mataas nga Dios, ang inyo Palasilungan, ang inyo Paglaum, ang inyo

Tagpangapgin, ang inyo Amay. Ang Manluluwas nagsaad nga kon pangitaon ninyo, makita ninyo.¹⁷

Nagasaksi ako nga ini matuod. Kon pangitaon ninyo ang kamatuoran sang Dios, nga inang sa karon daw madulom, buron, kag malayo amat-amat nga ipahayag kag mangin klaro kag mangin malapit sa inyo tagipusuon paagi sa kasanag sang grasya sang Dios. Matahum kaayo nga espirituhanon nga mga talan-awon, nga indi mahunahuna sang tawhanon nga mata, ang ipakita sa inyo.

Panaksihon ko nga ang ining espirituhanon nga kasanag malab-ot gid sang tagsa ka anak sang Dios. Pagpasanagon sini ang inyo kaisipan kag magadala sang pagpaayo sa inyo tagipusuon kag kalipay sa inyo kabuhi. Mahal kong mga kauturan, palihog indi pagpadugayi ang pagpangita kag pagpabakod sang inyo personal nga panaksihon parte sa langitnon nga

hilikuton sang Dios, nga amo ang hilikuton sang kasanag kag kamatuoran.

Ang inyo personal nga panaksihon parte sa kasanag kag kamatuoran indi lamang magabugay sa inyo kag sa inyo kaliwatan diri sa kalibutan kundi magaupod man ini sa inyo sa bug-os nga wala'y katapusan, sa tunga sang mga kalibutan nga wala'y katapusan. Ini ginasaksi ko kag ginabilin ko sa inyo ang akon bendisyon sa ngalan ni Jesucristo, amen.

MGA TANDA

1. Moses 1:33.
2. Tan-awa sa Marcia Bartusiak, *The Day We Found the Universe* (2009), xii. Nagakasorresa gid ako pirme nga pihoh-pihoh gid kita sa aton mga konklusyon. Kon kaisa ang aton kompiyansa dako gid kaayo nga laom naton yara na sa aton ang tanan nga kamatuoran. Pareho sa sini nga kaso: "Si Simon Newcomb, ang dean sang astronomy sa Amerika sang talipuspusan sang ika-disenuebe nga siglo, naghambal sa pagpahanungod sang isa ka obserbatoryo nga 'kon sa patag sang astronomy . . . daw malapit nalang naton malambot ang punta sang aton nahibaluan.
3. Maayo gid nga binagbinagon ang Moses 1:33, 35 parte sa sining "bag-o" nga pagtukib. Ang libro ni Moses sa Pearl of Great Price ginpahayag sa Propeta nga si Joseph Smith sang Hunyo 1830 halos isa ka siglo antes ginwraigwag ni Edwin Hubble ang iya pagkatukib sang mga galaxy sa malayo.
4. Tan-awa, halimbawa, ang Hubble Heritage Image Gallery sa heritage.stsci.edu/gallery/gallery.html.
5. Tan-awa sa Juan 14:6.
6. Tan-awa sa 3 Nefi 17:3.
7. Alma 32:27
8. Tan-awa sa Doctrine and Covenants 67:3.
9. Tan-awa sa Moroni 10:3-5.
10. Juan 7:17; tan-awa man sa Salmo 25:14; Juan 3:21.
11. Tan-awa sa Doctrine and Covenants 82:10.
12. 1 Mga Taga-Corinto 2:14
13. Tan-awa sa Doctrine and Covenants 50:24.
14. 1 Mga Taga-Corinto 1:18
15. Moroni 10:32; tan-awa man sa Doctrine and Covenants 20:59.
16. Tan-awa sa Alma 5:26.
17. Tan-awa sa Doctrine and Covenants 88:63.